

# Chwain yn y carchar

Dewrder / maddeuant / ffyddlondeb

Ydych chi'n credu ei bod hi'n bwysig dysgu maddau i'n gilydd? Ydi o'n iawn i ddal dig tuag at bobl eraill? Yn y stori hon cawn hanes gwraig a garcharwyd yn ystod yr Ail Ryfel Byd. Er iddi gael ei phoenydio fe faddeuodd i'w phoenydiwr.

“Mae 'na le i ryw ugain arall,” gwaeddodd un o'r gwarchodwyr. Dyma ei gyd-warchodwyr yn gwthio ugain o wragedd i grombil y wagen. Yn eu plith roedd dwy chwaer – Corrie a Betsie. Roedden nhw ar eu ffordd i'r carchar. Roedd wyth deg ohonyn nhw yn y wagen oedd yn cael ei thynnu gan drên. Am bedwar diwrnod bu'r trên yn araf bwffian trwy'r wlad. Yna, dyma gyrraedd pen y daith, sef carchar Ravensbruck. Gwyddai'r ddwy chwaer na fydden nhw byth yn cael dod allan o'r carchar hwn yn fyw.

Ar ôl mynd i mewn drwy'r giatiau haearn, bu'n rhaid i'r merched gymryd cawod. Roedd hyn yn golygu tynnu eu dillad o flaen y gwarchodwyr. Ond roedd gan Corrie rywbeth i'w guddio. Beibl a moddion ar gyfer ei chwaer. Beth allai hi wneud?

“Mae'n rhaid i mi fynd i'r toiled,” meddai wrth un o'r gwarchodwyr.

“Gwnewch yn y dreiniau yn fan'na,” oedd yr ateb pendant yn ôl. Ar ei ffordd i gomel y gawodfa fe welodd hi ddwy fainc ar bennau'i gilydd.

“Dyna le da i guddio'r Beibl a'r moddion.” Ac felly y bu.

Ar ôl ymolchi yn y gawod, aeth i chwilio am y Beibl a'r moddion a'u cuddio unwaith eto o dan ei dillad.

Ond beth oedd yn digwydd yn awr? Roedd y gwarchodwyr yn archwilio pob un o'r merched ar eu ffordd o'r gawod. “Maen nhw'n siŵr o weld y Beibl y tro hwn,” meddai wrthi'i hun. Dechreuodd weddio tra oedd yn sefyll yn y gynffon o ferched oedd yn disgwyl i gael eu harchwilio.

Roedd hi'n gwybod bod Duw yn barod wedi ateb ei gweddïau. Do, fe gafodd le i guddio'r Beibl a'r moddion. Roedd hi'n gwybod y byddai Duw'n helpu'r eilwaith.

Ond fe ddigwyddodd rhywbeth rhyfedd iawn. Fe gafodd y wraig oedd yn sefyll o'i blaen ei harchwilio'n drylwyr. Corrie oedd y nesaf. Ond am ryw reswm wnaeth y gwarchodwyr ddim cymryd fawr sylw ohoni. Fe'i hanwybyddodd yn llwyr. Aeth yn syth at Betsie oedd yn sefyll tu ôl iddi.

Corrie Ten Boom: 1892-1983

Digwyddodd yr un peth yn union wrth iddyn nhw adael yr adeilad. Pan ddaeth y gwarchodwr ar draws Corrie dywedodd, “Ymlaen, brysiwch, ymlaen â chi,” heb ei harchwilio o gwbl. Gwthiodd hi allan o'r adeilad a hithau a'i Beibl o dan ei dillad. Bu cryn ddefnydd ar y Beibl ar ôl y diwrnod hwnnw. Bob bore byddai Corrie yn darllen y Beibl i'w chyd garcharorion. Fe fydden nhw hefyd yn gweddio'n ddistaw bach ac yn cyd-ganu emynau yn ddistaw bach.

Ond beth petai un o'r gwarchodwyr yn dod i mewn i'r ystafell? Byddai'n sicr o ddwyn y Beibl. Ond ddaeth yna'r un gwarchodwr i mewn o gwbl. Ymhellach ymlaen daethpwyd i wybod pam. Roedd y rhan yma o'r carchar yn llawn o chwain. Doedd y gwarchodwyr ddim eisiau chwain ar eu dillad. Felly, yr unig beth i'w wneud oedd cadw draw. Credai Corrie fod pob chwannen yn wyrth fechan gan Dduw.

Ar ôl misoedd yn y carchar, bu farw Betsie. Ac ymhen tridiau ar ôl ei marwolaeth cafodd Corrie ei galw i'r swyddfa. “Mae'n rhaid eu bod wedi darganfod y Beibl,” meddai wrthi'i hun.

Cafodd ddarn o bapur ac arno'r geiriau “Rhyddhawyd”. Roedd hi'n rhydd i adael y carchar. Roedd hi wedi gwirioni'i phen. Ond pam? Fe ddarganfuwyd mai camgymeriad oedd y cyfan. Ond roedd Corrie ymhell, bell i ffwrdd erbyn hynny.

Penderfynodd roi ei bywyd i gyd i Dduw. Un noson, mewn eglwys yn yr Almaen, ar ôl iddi orffen siarad â'r gynulleidfa, daeth dyn ati i ysgwyd ei llaw. Pwy oedd o tybed? Ef oedd y gwarchodwr yn y carchar yn Ravensbruck. Cofiodd Corrie am ei greulondeb.

“Fedra i ddim maddau iddo,” meddai. Ond clywodd lais Duw. Ysgydwodd ei law a thrwy hynny maddeuodd i'r gwarchodwr. A dyna fu hanes Corrie am weddill ei hoes – dysgu pobl i faddau i'w gilydd. Bu farw yn 1983 yn 91 oed.



“Yr Arglwydd yw fy mugail.”  
Salm 23:1



O Dad, helpa fi bob amser i faddau.  
Paid â gadael i mi ddal dig.  
Amen.



Trafodwch y syniad o faddeuant.  
Beth mae maddeuant yn ei wneud i'r hwn sy'n maddau?